

Minister Otmar Oduber:

Ley pa regla All-Inclusive ta pa segura un balansa economico adecuado pa henter pueblo

ORANJESTAD - Dialuna mainta Minister Otmar Oduber a vocifera su punto di bista pa locual ta trata tur comentario cu tin pa cu intencion di Gobierno pa introduci un cambio di ley riba dunamento di permiso pa opera hotel na Aruba.

E mandatario a indica cu tin comentarionan contra pa cambia e ley aki y den caso di hotelnan, nan kier mantene tur derecho adkiri den pasado, conforme un ley cu ta data for di añanan 50, cu ta regla unicamente e aspecto di salubridad y candela.

“Pues nada pero absolutamente nada mas ta regla, paso tempo e ley a wordo traha practicamente den un era cu no tabatin hotel mes na Aruba.

Di otro banda por scucha tur caminda cu ya caba for di tur otro doño di negoshinan cu mester cambia ley paso si sigui cu e ultimo desaroyonan caminda tin mas cambianan “all inclusive” cu lo sigui influencia e inventario di cambianan na Aruba, esaki

lo caba cu e comercio pafo di hotelnan.

Ki situacion tin na e momentonan aki na Aruba?

Si sigui e ponencianan di doño of managernan di hotel, nan kier pa cambia e ley pa hotelnan nobo so, pero e realidad den esaki na Aruba ta diferente ya cu no ta un hotel nobo a bin ora cu Allegro/Occidental/Barcelo a yega, caminda nan a cumpra e permiso di Americana Hotel over y a sigui cu RIU 1 tampoco tabata nobo y nan tambe a cumpra e permiso di Sheraton Hotel over, y recientemente atrobe por tuma nota cu den caso di RIU 2 cu a cumpra e permiso di Westin over. Ta den e contexto aki tin preocupacion grandi y mester bay procura traves di ley cu esunnan cu un permiso actual tambe cay bou e cambio di ley pa limita e expansion di hotelnan All Inclusive na Aruba.

No ta cuestion di kita nan permiso cu nan tin actualmente den nan poder pa all inclusive pero aki ta papiando di limita y ningun momento di controla, caminda lo traha

pa mantene un balansa adecuada den e producto cu nos ta ofrece como destinacion.

Un destinacion cu ta depende pa casi 90 % riba turismo, y aki no ta solamente hotelnan, pero ta henter Aruba su economia ta depende di turismo.

Ta corecto cu e peticion pa “All Inclusive” ta creciendo na nivel global pero esey no kiermen pa definicion cu e ta bon pa nos?

Mi ta sigur cu no ! y mi ta puntra mi mes, si henter mundo, rapport tras rapport y estudionan tras estudionan, ta muestra con negativo e efectonan ta riba un destinacion y su economia, y aki nos por mira kico e la haci cu Jamaica y Republica Dominicana cu ta mas cerca di nos y un gran cantidad di otro destinacionnan, anto dicon e ora ta pensa cu aki na Aruba e desaroyo aki lo ta otro ?

Ta demostra cu All Inclusive ta nifica cu e hotel mes ta cuminsa importa su produccion y logicamente bishitantenan lo come menos den restaurantnan, pa motibo cu

den nan pakete nan por scoge for di entre varios restaurant pornada den e hotel mes y algun otro cu bo por paga pe den e mesun hotel.

Den henter e desaroyo aki esaki kiermen cu mester di menos taxi y menos negoshi di huur auto cu lo no ta necesario, menos movicion pafo di hotel, cual lo nifica menos trabou den tur e sectornan menciona. Y atrobe esaki no ta nada nobo, tin tur prueba di rond mundo den otro destinacionnan cu a sinti e efecto negativo aki.

Algun luna atras nos a scapa di haya un otro All Inclusive cu lo a cumpra un permiso existente, den e caso aki esun di Radisson, ora cu hopi a lanta para fuerte cu briyo y bisa ta basta, no!

Mientras mas nos tarda pa cambia e ley y reglamenta e fenomeno aki, mas riesgo nos ta sigui core cu un di e dianan aki mas All Inclusive ta cumpra y tuma tur hotelnan existente over.

Mientras AHATA y su miembronan (algun hotel) ta boga pa nan interes y di

nan compania (cu ta logico), NOS mester tin cu procura pa e interes di henter e industria turistico y di tur e 120 mil habitantenan cu ta keda depende pa casi 90 % riba e industria aki di turismo.

Nos ta respeta y traha estrechamente cu hotelnan all inclusive existente y ta para pa presencia di e tipo di hotelnan aki, pero nos ta para na mes momento pa un oferta di acomodacion balansa y no uno domina dor di e producto all inclusive, cu por ehempel ta e caso na Republica Dominicana y ya na Cuba caba.

Destinacionnan cu cual nos a bin ta competi exitosamente caba durante ultimo añanan, cu un oferta di acomodacion balansa.

No ta cuestion di capricho di Gobierno of di Minister, pero di e interes general di nos pais, caminda hopi negoshi y trahadonan ta depende y lo saca probecho di un maneho balansa y serio cu lo no mishu cu nan interes economico y financiero,” Minister di Turismo, Otmar Oduber ta splica riba su facebook. □